

250
C

S. AUR. AUGUSTINI
HIPPONENSIS EPISCOPI
CONTRA LITTERAS
PETILIANI

LIBRI III.

LIBER II¹.

*In quo ad omnia et singula verba Epistolæ Petilianæ
sic respondet Augustinus, tanquam cum adversario
præsente colloquatur.*

I. PRIMIS partibus Epistolæ Petiliani², quās tantum modo inveneramus, satis nos respondisse meminerunt, qui ea legere vel audire potuerunt. Sed quia postea tota est a fratribus inventa atque descripta, missaque nobis ut universæ respondeamus, non erat defugiendum hoc officium styli nostri: non quia ille novum aliquid dicit, cui non jam multis modis et sæpe responsum est: sed propter tardiores

¹ Scriptus circiter initium anni 402. — ² Vide D. Guillon, tom. xxii, pag. 725-278.



FONDO EMETERIO
VALVERDE Y TELLEZ

fratres, qui ea quæ alicubi legerint, ad omnia paria referre non possunt, ita morem geram eis, qui me omnino ad singula respondere compellunt, ut quasi alternis sermonibus in præsentia disseramus. Verba ex Epistola ejus ponam sub ejus nomine, et responsionem reddam sub meo nomine, tanquam, cum ageremus, a notariis excepta sint. Ita nemo erit qui me aliquid prætermissee, aut propter indiscretas personas se non potuisse intelligere conqueratur: simul etiam ut iidem ipsi Donatistæ, qui coram nobiscum disserere nolunt, per litteras suas ediderunt, ita non effugiant respondentem sibi ad singula veritatem, tanquam nobiscum facie ad faciem colloquantur.

II. Ab ipso exordio Epistolæ suæ PETILIANUS dixit: « Petilianus episcopus dilectissimis fratribus, compresbyteris et diaconibus ministris per dioecesim nobiscum in sancto Evangeliō constitutis: Gratia vobis et pax a Deo Patre nostro et Domino Iesu Christo. »

III. AUGUSTINUS respondit: Agnosco apostolicam salutationem: videris quis dicas, unde tamen didiceris quod dicis adverte. Sic salutat Paulus Romanos, sic Corinthios, sic Galatas, sic Ephesios, Colossenses, Philippenses, Thessalonicenses. Quæ igitur dementia est, cum his Ecclesiis nolle communicare pacis salutem, in quarum Epistolis didicisti pacificam salutationem.

IV. PETILIANUS dixit: « Bis baptisma nobis objiciunt ii qui sub nomine baptismi animas suas reo lavaero polluerunt, quibus equidem obscoenis sordes cunctæ mundiores sunt, quos perversa munditia aqua sua contigit inquinari. »

V. AUGUSTINUS respondit: Nec aqua nostra inquinamur, nec vestra mundamur: sed aqua baptismi in nomine Patris et Filii et Spiritus sancti cum datur alicui, nec nostra, nec vestra est, sed illius de quo Joanni dictum est: « Super

» quem videris Spiritum sicut columbam descendentem
» et manentem super eum, hic est qui baptizat in Spiritu
» sancto¹. »

VI. PETILIANUS dixit: « Conscientia namque dantis attenditur, qui abluat accipientis. »

VII. AUGUSTINUS respondit: De conscientia Christi ergo securi sumus. Nam si quemlibet hominem ponas, incerta erit accipientis mundatio, quia incerta conscientia est abluentis.

VIII. PETILIANUS dixit: « Nam qui fidem a perfido sumpserit, non fidem percipit, sed reatum. »

IX. AUGUSTINUS respondit: Non est perfidus Christus, a quo fidelis homo fidem percipit, non reatum. Credit quippe in eum qui justificat impium, ut deputetur fides ejus ad justitiam².

X. PETILIANUS dixit: « Omnis res enim origine et radice consistit; et si caput non habet aliquid, nihil est: nec quidquam bene regenerat, nisi bono semine regeneretur. »

XI. AUGUSTINUS respondit: Quid te pro Christo vis opponere, sub quo te non vis ponere? Ille est origo et radix caputque nascentis, de quo non timemus sicut de homine quolibet, ne forte sit factus et pessimus, et de origine pessima oriamus, de pessima radice surgamus, pessimo capiti conformemur. Quis enim homo de homine securus sit, cum scriptum sit: « Maledictus omnis qui spem suam ponit in homine³? » Semen autem quo regeneramur, verbum Dei est, id est, Evangelium. Unde Apostolus dicit: « In Christo enim Iesu per Evangelium ego vos genui⁴. » Qui tamen etiam non caste annuntiantes Evangelium, annuntiare permittit, et in hoc gaudet: quia etsi non caste annuntiabant, sua quærentes,

¹ Joan. i, 33. — ² Rom. iv, 5. — ³ Jerem. xvii, 5. — ⁴ Cor. iv, 15.

non quæ Jesu Christi, castum tamen erat quod annuntiabant. Et dixerat Dominus de quibusdam talibus : « Quæ dicunt facite, quæ autem faciunt facere nolite ; dicunt enim, et non faciunt¹. » Si ergo caste annuntiatur quod castum est, etiam ipse annuntiator, quia verbo consociatur, credentem congenerat : si autem ipse non regeneretur, castum tamen sit quod annuntiat, nascitur credens non ex ministri sterilitate, sed ex veritatis fœcunditate.

XII. PETILIANUS dixit : « Quæ cum ita sint, fratres, quæ potest esse perversitas, ut qui suis criminibus reus est, alium faciat innocentem, dicente Domino Iesu Christo ; » Arbor bona fructus bonos facit, arbor mala malos fructus facit : numquid colligunt de spinis uvas^{2?} » Et iterum, « Omnis homo bonus de thesauro cordis sui profert bona, et omnis homo malus de thesauro cordis sui profert mala^{3.} »

XIII. AUGUSTINUS respondit : Omnis homo etiam si non sit suis criminibus reus, alterum non fecit innocentem, quia non est Deus : alioquin si ex innocentia baptizantis expectatur ut fiat innocentia baptizati, tanto emit quisque innocentior, quanto innocentiora a quo baptizetur invenerit, et tanto ipse minus erit innocens, quanto et ille a quo baptizatur. Et si forte contra aliquem temet odium qui baptizat, hoc et illi qui baptizatur, imputabitur. Ut quid ergo miser currit ad baptismum ? Ut ei dimittantur peccata sua, an ut imponantur aliena ? An sicut navis mercatoris alia ponat, alia suscipiat ? Arborem autem bonam et fructum ejus bonum, et arborem malam et fructum ejus malum, homines solemus intelligere, et opera eorum, sicut consequenter ostenditur in verbis, quæ tu quoque commemorasti : « Bonus homo de bono thesauro cordis sui profert bona, et malus homo de malo thesauro cordis sui

¹ Matth. xxii, 3. — ² Id. vii, 16. — ³ Id. xii, 35.

» profert mala, « Cum autem Dei verbum prædicat, Dei sacramentum ministrat, non de suo, si malus est, prædicat aut ministrat : sed deputabitur in eis, de quibus dictum est : « Quæ dicunt facite, quæ autem faciunt facere nolite ; » dicunt enim quæ Dei sunt, faciunt autem quæ sua sunt^{1.} » Nam si ita est, ut dicis, id est, fructus baptizantium ipsi baptizati existimantur, magnum malum Africæ denuntiatis, si tot Optati pullulaverunt, quotquot baptizavit Optatus.

XIV. PETILIANUS dixit : « Et iterum, Qui baptizatur a mortuo, non ei prodest lavatio ejus. Non mortuum, corpus exanime, nec hominis funus porrectum asseruit esse baptistam ; sed Dei non habentem spiritum, qui mortuo comparatur, sicut alio loco Discipulo manifestat, Evangelio protestante, ait Discipulus ejus : « Domine, permitte mihi sepelire patrem meum. Ait illi Jesus : Sequere me et sine mortuos, mortuos suos sepeliant^{2.} » Pater discipuli non erat baptizatus, paganum paganis addixit : nisi hoc de infidelibus dixerit, mortuus mortuum non potest sepelire. Mortuus igitur quidem non aliqua morte, sed vita sua percussus. Nam qui sic vivit ut reus sit, vita mortua cruciatur. A mortuo igitur baptizari, hoc est mortem sumpsisse, non vitam. Agendum nobis et dicendum est, quatenus traditor vita mortuus habeatur. Mortuus est ille qui baptismo vero nasci non meruit, mortuus est ille similiter qui justo baptismo genitus mixtus est traditori : ambo vitam baptismi non habent, et qui nunquam penitus habuit, et qui habuit et amisit. Dicit enim Dominus Jesus Christus : « Advenient in eum septem spiritus nequiores, et erit homo ille deterior priore^{3.} »

XV. AUGUSTINUS respondit : Diligentius quære quomodo dictum et quomodo intelligentum sit testimonium

¹ Matth. xxiii, 3. — ² Id. viii, 21. — ³ Id. xii, 45.

quod de Scriptura posuisti. Nam quia mortui solent mystice appellari omnes iniqui, manifestum est : sed Christus, cuius est baptisma verum, quod propter hominis vitia dicitis falsum, vivit sedens ad dexteram Patris, et nec ipsa carnis infirmitate jam morietur, et mors ei ultra non dominabitur : cuius baptismo qui baptizatur, non a mortuo baptizatur ; et si forte ministri operarii dolosi sua quærentes, non quæ Jesu Christi, et Evangelium non caste annuntiantes, et Christum per contentionem et invidiam prædicantes, propter iniquitates suas mortui sunt appellandi, sacramentum tamen Dei vivi nec in mortuo moritur. Mortuus enim erat Simon ille a Philippo in Samaria baptizatus, qui Donum Dei volebat pecunia comparare¹ : sed vivebat ad ejus poenam baptismus quod habebat.

XVI. Quam sit autem falsum quod dicis : « Ambo vitam baptismi non habent, et qui nunquam penitus habuit, et qui habuit et amisit, » hinc licet advertas, quod qui baptizati apostatant, et per poenitentiam redeunt, non eis reditutur baptismus, quem si amitterent, redderetur. Mortui sane vestri quomodo baptizant secundum sensum vestrum ? An mortui non sunt (ut cætera taceam, et dicam quod omnibus notum atque quotidianum est) ebriosi ? Cum de vidua dicat Apostolus : « Quæ autem in deliciis agit, vi- » vens mortua est² ? » Deinde in illo concilio vestro, quo Maximianum cum suis auctoribus vel suis ministris damnastis, excidit tibi quam eloquenter dixeritis : Aegyptiorum admodum exemplo, pereuntium funeribus plena sunt littora, quibus in ipsa morte major est poena, quod post extortam aquis ultricibus animam, nec ipsam invenerunt sepulturam ? » Et tamen unus eorum Felicianus utrum revixerit, vos videritis : secum tamen apud vos intus habet, quos foris mortuus baptizavit : Sicut ergo a vivo bap-

¹ Act. viii, 13 et 15. — ² Tim. v, 6.

tizatur, qui vivi Christi baptismo induitur : sic a mortuo baptizatur, qui mortui Saturni, vel cujuslibet alterius baptismo involvitur : ut interim cito dicamus, quomodo verba quæ posuisti, sine cujusquam nostrum angustia possint intelligi. Nam sicut accipiuntur a vobis, non vos explicare, sed nos vobiscum implicare contenditis.

XVII. PETILIANUS dixit : « Agendum, inquam, nobis dicendumque est, quatenus perfidus traditor vita mortuus habeatur. Judas apostolus fuit, cum traderet Christum : idemque honore apostoli perdito spiritualiter mortuus est, suo postea laqueo moriturus, sicut scriptum est ? « Poenitet me, inquit, quia tradidi sanguinem justum, » et abiit, et laqueo se suspendit¹. » Laqueo traditor periit, laqueum talibus dereliquit : de quo Dominus Christus clamavit ad Patrem : « Pater, quos dedisti mihi, omnes servavi, et ex illis nullus periit nisi filius perditionis, » ut impleretur Scriptura². » Olim namque David sic in eum sententiam dixerat, qui esset Christum perfidis traditurus : « Episcopatum ejus accipiat alter ; sit uxor ejus vi- » dua, et filii ejus orphani³. » Ecce quantus est spiritus Prophetarum, ut cuncta futura pro præsentibus viderit, ut ante plurima sæcula nasciturus traditor damnaretur. Denique ut dicta sententia completeretur ; Episcopatum ejus apostoli perdi sanctus Mathias accepit. Nemo hinc stolidus, nemo perfidus disputet : triumphum Mathias, non injuriam retulit, qui de Domini Christi victoria spolium retulit proditoris. Hoc igitur facto episcopatum tibi quid vindicas haeres nequioris traditoris; Judas Christum carnaliter tradidit, tu spiritualiter furens Evangelium sanctum flammis sacrilegis tradidisti. Judas legislatorem tradidit perfidis, tu quasi ejus reliquias legem Dei perdendam hominibus tradidisti : qui si legem diligeres, ut juvenes Mac-

¹ Matth. xxvi, 4. — ² Joan. xvii, 12. — ³ Psal. cxi, 8.

chabæi, pro Dei legibus necareris¹: (si nex dici hominum potest, quos moriendo pro Domino perficit immortales:) quorum unus scilicet fratrum tyranno sacrilego hac fidei voce respondit: Tu quidem scelerate et impie de praesenti vita nos perdis; Rex autem mundi qui regnat in æternum et regni ejus non erit finis, mortuos nos pro suis sanctis legibus, in æternæ vitæ conservationem resuscabit. Si hominis mortui testamentum flammis incenderes, nonne falsarius punireris? Quid de te ergo futurum est, qui sanctissimam legem Dei judicis incendisti? Judam facti vel in morte penituit: te non modo non poenitet, verum etiam nequissimus traditor nobis legem servantibus persecutor et carnifex existis.

XVIII. AUGUSTINUS respondit: Vide quid intersit inter vestras maledicas voces, et nostras veridicas assertiones. Attende paululum. Ecce exaggerasti crimen traditionis: et invidiosissimis verbis, velut captiosus inventor, Judæ nos proditori comparasti. Ad hoc tibi ego cum brevissime respondero. Non feci quod dicens, non tradidi, falsa objicis, nunquam id probabis: nonne omnis iste verborum ingentium fumus repente dilabitur? An forte probare conaberis? Hoc ergo prius faceres, et deinde in nos tanquam in convictos quo velles cumulo invectionis insurges. Ecce una vanitas, audi alteram.

XIX. Tu ipse cum de predicta Judæ damnatione loqueris, dixisti: « Ecce quantus est spiritus Prophetarum, ut cuncta futura pro præsentibus viderit, ut ante plurima sæcula nasciturus traditor damnaretur: » et non vidisti eadem prophetia stabili et certa et inconcussa veritate, qua prædictum est, quod unus discipulus traditurus esset Christum, prædictum etiam quod totus mundus esset crediturus in Christum. Cur attendisti in prophetia

¹ 2 Mach. vii, 3.

hominem qui tradidit Christum, et non ibi attendisti orbum pro quo est traditus Christus? Quis tradidit Christum? Judas. Quibus eum tradidit? Judæis. Quid ei fecerunt Judæi? « Foderunt, inquit, manus meas et pedes, dinumeraverunt omnia ossa mea: ipsi vero consideraverunt et conspicerunt me, divisorunt sibi vestimenta mea, et super vestimentum meum miserunt sortem. » Quantum sit ergo quod tanto pretio emptum est, in Psalmo ipso paulo post lege. « Commemorabuntur et convertentur ad Dominum universi fines terræ; et adorabunt in conpectu ejus universæ patriæ gentium: quoniam Domini est regnum, et ipse dominabitur gentium¹. » Quis autem potest ad commemoranda cætera de orbe credituro innumerabilia prophætica documenta sufficere? Sed tu laudas prophetiam, quia vides in ea hominem qui vindicit Christum, nec in ea vides possessionem, quam emit venditus Christus. Ecce altera vanitas, audi tertiam.

XX. Inter multa tuæ invectionis verba dixisti: « Si hominis mortui testamentum flammis incenderes, nonne falsarius punireris? Quid de te ergo futurum est, qui sanctissimam legem Dei judicis incendisti? » Hæc dicens non attendisti, quod te utique mouere deberet, quomodo fieri posset, ut nos testamentum incenderemus, et in ea hæreditate consisteremus, quæ illo testamento conscripta est: vos autem mirum est testamentum servasse, et hæreditatem perdidisse. Nonne in eo Testamento scriptum est: « Postula a me, et dabo tibi gentes hæreditatem tuam, et possessionem tuam terminos terræ²? » Huic hæreditati communica, et objice mihi de Testamento quod voles. Nam quæ dementia est, ideo Testamentum tradere te noluisse flammis, ut contra verba litiges testatoris? Nos autem cum habeamus in manibus Gesta ecclesiastica et mu-

¹ Psal. xxi, 17-29. — ² Id. ii, 8.

nicipalia, in quibus legamus eos qui contra Cæcilianum alterum episcopum¹ ordinaverunt, potius fuisse divinorum Codicum traditores, non tamen insultamus, non invehi-mur in vos, nec sanctarum paginarum cineres in vestris manibus plangimus, nec Macchabæorum tormenta fla-grantia sacrilegio vestri timoris opponimus, dicentes : Ves-tra potius membra quam Dei eloquia ignibus traderetis. Nolumus enim esse vani, ut alienis commissis, quæ aut ignoratis aut improbatis, vobis inanem strepitum conci-temus. Quod autem vos a totius orbis communione sepa-ratos videmus (quod scelus et maximum, et manifestum, et omnium vestrū est) si exaggerare velim, tempus me citius quam verba defcient. Et hoc tu si defendere velis, ea es objecturus orbi terrarum, quæ si objicienda sunt; admones unde amplius accuseris; si objicienda non sunt, non defenderis. Ut quid ergo inflaris adversus me de tra-ditione, quæ nec mea est, nec tua, si manet illud pactum, ut non nobis objiciamus aliena; si autem non manet, tua potius est quam mea? Quanquam et manente illo pacto arbitror me justissime dicere, ut ille judicetur socius ejus qui tradidit Christum, qui cum toto orbe non se tradidit Christo. « Ergo, inquit Apostolus, Abrahæ semen estis, » secundum promissionem hæredes². » Et iterum dicit : « Hæredes quidem Dei, cohæredes autem Christi³. » Idem que semen Abrahæ ad omnes gentes pertinere demonstrat ex illo, quod Abrahæ dictum est : « In semine tuo bene-» dicentur omnes gentes⁴. » Quapropter puto justum esse quod postulo, ut testamentum Dei, quod jam olim aper-tum est, aliquantum advertamus, et quem non inveneri-mus traditi cohæredem, ipsum judicemus traditoris hæ-re-dem; ille pertineat ad Christi venditorem, qui Christum negat orbis emptorem. Nempe quando se post resurrectio-

¹ Majorinum. — ² Gal. iii, 29. — ³ Rom. viii, 17. — ⁴ Gen. xxii, 18.

nem Discipulis demonstravit, et palpanda membra dubi-tantibus præbuit, hoc illis ait : « Quoniam sic scriptum » est, et sic oportebat Christum pati, et resurgere tertia die, et prædicari in nomine ejus pœnitentiam et remis-sionem peccatorum per omnes gentes, incipientibus ab » Jerusalem¹. » Ecce a qua hæreditate vos alienatis : ecce cui hæredi resistitis. Ita-ne vero parceret Christo in terra ambulanti, qui contradicit in celo sedenti? Adhuc non intelligitis quoniam quidquid nobis objicitis, sermoni ejus objicitis. Promittitur christianus orbis, et creditur im-pletur, et contradicitur. Cogitate, obsecro, quid pati pro tanta impietate debuistis; et tamen si quid passi estis nescio, non vidi, non feci: tu hodie, qui non pateris vim per-secutionis meæ, redde mihi rationem separationis tuæ. Sed iterum ac sæpe dicturus es; quæ si non probas, ad nemini-mum pertinent : si autem probas, ad me non pertinent.

XXI. PETILIANUS dixit : « His ergo criminibus septus, esse verus episcopus non potes. »

XXII. AUGUSTINUS respondit : Quibus criminibus? Quid docuisti? qui ostendisti? Et si ostendisses crima nescio quorum, quid hoc ad semen Abrahæ, in quo benedicun-tur omnes gentes?

XXIII. PETILIANUS dixit : « Si Apostoli persecuti sunt aliquem, aut aliquem tradidit Christus? »

XXIV. AUGUSTINUS respondit : Possem quidem dicere ipsum Satanam omnibus malis hominibus esse pejorem, cui tamen tradidit Apostolus hominem in interitum carnis, ut spiritus salvis sit in die Domini Jesu². Itemque alios, de quibus dicit : « Quos tradidi Satanæ, ut discant non blasphemare³. » Et Dominus Christus flagellatos expu-lit de templo improbos mercatores, ubi etiam connexum est testimonium Scripturæ dicentis : « Zelus domus tuæ co-

¹ Luc. xxiv, 26. — ² 1 Cor. v, 5. — ³ Tim. i, 20.

» medit me¹. » Ecce invenimus Apostolum traditorem, Christum persecutorem. Possem ista dicere, et te in non parvos aestus mittere, ut non querelas eorum qui patiuntur, sed animum eorum qui faciunt, quærere cogereris. Sed hinc noli laborare, non ea dico ; sed dico ad semen Abrahæ, quod est in omnibus gentibus, non pertinere, si quid non recte vobis factum est, fortasse a palea Dominicæ segetis, quæ nihilominus est in omnibus gentibus. Vos ergo reddite rationem separationis vestræ. Sed prius attendite quales habeatis, quos vobis objici non vultis ; et videte quam inique faciatis, cum aliena facta nobis objicitis, etsi ea quæ dicitis probaretis. Ita nulla erit ratio separationis vestræ.

XXV. PETILIANUS dixit : « At enim aliqui dicent, Filii non sumus traditoris. Ejus est aliquis filius, cuius facta sectatur. Hi enim certissimi filii sunt, idemque parentibus similes, quos nonista caro, nec sanguis, sed mores et facta parentibus consimiles generunt. »

XXVI. AUGUSTINUS respondit : Paulo ante nihil contra nos dicebas, nunc etiam cœpisti dicere aliquid et pro nobis. Hæc enim propositio tua in eo te tenet, ut si nos hodie, cum quibus agis, non conviceris tradidores et homicidas, et si quid aliud criminari, quidquid tale ostendebis in eis, qui nos tempore præcesserunt, omnino nobis obesse non possit. Quorum enim dissimilia facta habemus, eorum filii esse non possumus. Et vide quo te commiseris : si aliquem forte etiam nostræ ætatis hominem, et nobiscum viventem, de aliquo tali reatu forte conviceris, nullo modo præjudicat omnibus gentibus, quæ in semine Abrahæ benedicuntur, a quibus tu te separando sacrilegus inveniris. Ita (quod fieri non potest) nisi omnes, qui ubique sunt, noveris, omniumque mores et facta non so-

¹ Joan. ii, 15.

lum didiceris, sed etiam demonstraveris, tam mala esse quam dicis, non habes cur objicias orbi terrarum, qui est in sanctis, nescio quos parentes, quibus eos probas esse consimiles. Nec te aliquid adjuvabit, si etiam demonstrare potueris, eos qui tales non sunt, cum eis qui tales sunt sumere sacramenta communia. Primo quia vos ipsos respicere debetis, cum quibus ea celebretis, quibus detis, a quibus sumatis, et vobis eos objici nolitis. Deinde si filii sunt Judæ, qui diabolus inter Apostolos fuit, quicumque facta ejus imitantur : cur non filios Apostolorum dicamus, qui non facta sua cum talibus, sed Domini sacramenta communicant, sicut Apostoli Dominicam cœnam cum illo traditorē sumpserunt? ideo, vobis longe dissimiles, quod hominibus unitatem servantibus hoc objicitis, quod concissa unitate vos facitis?

XXVII. PETILIANUS dixit : « De se ipso Judæis dicit Dominus Christus, « Si non facio facta Patris mei, nolite « mihi credere¹. »

XXVIII. AUGUSTINUS respondit : Jam supra respondi, Hoc et verum est, et pro nobis contra vos est.

XXIX. PETILIANUS dixit : « Falsidicos et mendaces sic identidem objurgat : Filii diaboli estis, et ab initio enim ille accusator fuit, et in veritate non stetit. »

XXX. AUGUSTINUS respondit : Non solemus legere, ille accusator fuit; sed, ille homicida fuit. Quærimus autem unde fuerit diabolus homicida ab initio ; et invenimus, quod primum hominem occiderit, non gladium stringendo, aut aliquam vim corporaliter inferendo ; sed persuadendo peccatum, et a paradisi felicitate dejiciendo. Quod tunc paradisus, hoc nunc Ecclesia. Diaboli ergo filii sunt, qui homines ab Ecclesia seducendo interficiunt. Sicut autem per verba Dei novimus ubi sit plantatus para-

¹ Joan. x, 37.

disus, sic per verba Christi ubi sit Ecclesia didicimus;
 » Per omnes, inquit, gentes, incipiens ab Jerusalem¹. »
 Ab isto universo ad partem quamlibet quisquis separat
 hominem, ille diaboli filius et homicida convincitur. Sed
 et verbum, quod ipse posuisti, ut de diabolo dices, Ille
 accusator fuit, et in veritate non stetit, vide in quos con-
 veniat. Accusatis enim orbem terrarum criminibus alio-
 rum, quos etiam ipsos accusare potius quam convincere
 potuistis; et in veritate Christi non stetistis. Ille enim dicit:
 Ecclesiam per omnes gentes incipientem ab Jerusalem:
 vos autem, in parte Donati.

XXXI. PETILIANUS dixit: « Tertio quoque similiter
 persecutorum dementiam hoc nomine appellat; « Proge-
 » nies viperarum, quomodo fugietis judicium gehennæ?
 » Ideoque mittō ad vos Prophetas, et sapientes, et scri-
 » bas; et ex illis occidetis, et crucifigetis, et flagellabi-
 » tis in synagogis vestris, donec veniat super vos omnis
 » sanguis justus, quem effudistis in terram a sanguine Abel
 » justi, usque ad sanguinem Zachariæ filii Barachiae,
 » quem occidistis inter templum et altare². » Numquid
 vere carnaliter sunt filii viperarum, ac non magis mente
 serpentes, et trilingui malitia, tactuque mortifero et spiritu
 veneni flagrantes? Vere viperæ facti sunt, qui insontibus
 populis mortes morsibus vomuerunt. »

XXXII. AUGUSTINUS respondit: Hæc si dicam de tali-
 bus esse dicta, quales vos estis, respondebitis, Proba.
 Quid enim, tu probasti? Aut si eo putas probari quo di-
 cuntur, non opus est eadem repetere. Recita illa ipsa tibi
 et a nobis in vos. Ecce et ego probavi, si hoc est probare.
 E' tamen disce quid sit probare. Neque enim extrinsecus
 qua' vero documenta, ut vos viperas probem. Ecce idipsum
 viperæ reum est, non habere in ore firmamentum veritatis, sed

¹ Luc. ³ xxiv, 47. — ² Math. xxiii, 32.

venenum maledictionis, sicut scriptum est: « Venenum
 aspidum sub labiis eorum¹. » Et quia hoc passim a quolibet
 in quemlibet dici potest, quasi quereretur, quorum?
 continuo subjecit: « Quorum os maledictione et amaritu-
 » dine plenum est. » Cum ergo talia dicitis in homines per
 totum mundum dispersos, et quos omnino ignoratis, quo-
 rum etiam multi nec Cæciliani, nec Donati nomen audie-
 runt: nec auditis in silentio respondentes: Non ad nos
 pertinet quidquid dicitis, non vidimus, non fecimus, quid
 loquamini penitus ignoramus: vos qui nihil aliud vultis,
 quam dicere quod probare omnino non potestis, quid
 aliud quam os vestrum maledictione et amaritudine ple-
 num est? Jam videte utrum vos possitis ostendere non esse
 viperas, nisi ostenderitis omnes Christianos omnium gen-
 tium tradidores esse, et homicidas, et non esse Christianos.
 Imo vero etiam si potestis singulorum hominum
 per totum orbem diffusorum vitas et facta nosse et osten-
 dere, tamen antequam id faciatis, cum temere ista jacta-
 tis, os vestrum vipereum est, os vestrum maledictione et
 amaritudine plenum est. Ostendite jam, si potestis, quem
 prophetam, quem sapientem, quem scribam occiderimus
 et crucifiximus et flagellaverimus in synagogis nostris.
 Attendite quanto labore impenso, nullo modo probastis,
 quod Donatus et Marcus prophetae fuerint, aut sapien-
 tes, aut scribæ, quia non fuerunt². Quod etsi possetis,
 quid faciatis ut ostendatis a nobis occisos, quos nec nos
 ipsi novimus? quanto minus orbis terrarum, cui venenosus
 ore maledicatis? Aut unde potestis ostendere animum nos
 habere consimilem interfectoribus eorum, quos nec saltem
 ab aliquibus imperfectos potestis ostendere? Attendite hæc
 omnia, videte utrum aliquid horum, vel de orbe terra-
 rum vel orbi terrarum probare possitis: cui tamen quia

¹ Psal. xii, 3. — ² Vide infra, n. 44, et contra Crescon lib. iii, n. 54.